

Bler engaschi per la promoziun da la generaziun giuvna

Uniun chantunala da chant dal Grischun

DA GION NUTEGN STGIER / ANR

■ En il center da l'onn da chant 2012 è natiralmain stada la 25. Festa da chant chantunala Trun. Activas èn dentant er stadas las uniuns districtualas da chant. En otg dis ha lieu ad Igis la radunanza da delegads da l'uniun tetgala dals chors da noss chantun. Il rapport annual da l'Uniun chantunala da chant dal Grischun è sin maisa. Cun leger quel èsi conscient ch'il chant viva en noss chantun, che noss chors èn activs e che l'engaschi per promover la generaziun giuvna da chant è exemplaric. Da preschent appartegnan a l'uniun ch'unescha las furmazions da chant da noss chantun 145 chors cun in dumber da 4512 chantaduras e chantadurs. Il dumber dals chors è be sa reduci per in chor e tar il dumber da las commembras e dals commembers dals chors è quel sa reduci per 51 chantaduras e chantadurs. Da quels 145 chors ch'appartegnan a l'uniun chantunala èn 46 chors virils, 73 chors maschadads, 9 chors da giuvenils, 15 chors d'uffants e 2 chors da dunnas. Entrads èn l'Uniun chantunala da chant dal Grischun èn trais chors e sortids da quella èn duas furmazions da chant. Fusiunà tar in chor han il Chor viril Cuira ed il Chor viril Frohsinn Cuira.

In vair success

En il center da l'onn da chant 2012 è cle-ramain stada la 25. Festa da chant chantunala Trun che ha gi lieu ils 9 e 10 da zercladur. Sa preschentads als experts ed a l'auditori èn 86 chors e da quels appartegnevan 70 a l'uniun tetgala dals chors dal Grischun. En ses rapport annual scri-va *Retus Giger*, il president da l'Uniun chantunala da chant dal Grischun, che la festa da chant haja confermà ch'il nivel da chant en noss chantun saja anc adina



Plaschaivel è bain che a l'Uniun chantunala da chant dal Grischun appartegnan 24 chors da giuvenils e d'uffants e che quels collavuran savens er cun auters chors.

FOTO P. A. BALTERMIA

fitg aut. Quai conferman er ils rapports dals experts, dentant da quella opiniun è er *Martin Zimmermann*, il president da la cumissiun da musica da l'Uniun chantunala da chant dal Grischun. Positiva saja cunzunt stada la qualitad dals chors rumantschs e tuttina recumonda *Martin Zimmermann* a quels chors dad ir novas vias cun tscherner litteratura en autras linguas ed auters stils. Quai che pertutga l'organisaziun haja il chor organisatur da la Festa da chant chantunala, il Chor cecilian Trun cun ses blers voluntaris, retschet be laud, è da leger en il rapport annual. Tut en tut saja la Festa da chant chantunala 2012 stada in vair success.

Suenter blers onns

Tar la radunanza da delegads da l'Uniun chantunala da chant dal Grischun ad Igis vegnan a sa retrair duas persunas ch'èn stadas ils ultims 15 onns fitg engaschadas per l'uniun e per il chant. Quai èn *An-*

drea Accola, da preschent vicepresidente da l'uniun e *Martin Zimmermann*, actualmain president da la cumissiun da musica da l'uniun. La suprastanza da l'Uniun chantunala da chant dal Grischun propona sco successurs da quels umens engaschads *Jeannette Meier* e *Heinz Girschweiler*. Undrads vegnan ad Igis gist 45 chantaduras e chantadurs sco veterans federals e sco veterans chantunals 41 dunnas ed umens. Quai che pertutga las finanzas ha l'uniun tetgala da las chantaduras e dals chantadurs da noss chantun gi in bun onn. Il quint annual sera tar antradas da passa 100 000 francs cun in gudogn da stgars 11 000 francs.

Rapports da las uniuns districtualas da chant

A pled vegnan en il rapport annual er ils presidents da las tshintg uniuns districtualas da chant. Sco quai che *Roland Capeder*, il president da l'Uniun di-

strictuala da chant Alvra, scriva, saja la scuntrada da chant a Salouf cun 50 participantas e participants stada in success. Tenor *Armon Parolini*, da preschent president dal District da chant Engiadina, Val Müstair e las Vals dal sid, è l'emna da chant «Ensemble 12» cun *Peter Appenzeller* a Lavin er stada in success cun 40 chantaduras e chantadurs. L'inscunter da chors per scolars dal District da chant Valrain/Moesa cun ina participaziun da 200 uffants e giuvenils è stada l'activad principala en quella uniun. Er l'emna da chant per giuvenils dal District da chant Grischun dal nord ha attratg l'interess da 70 giuvenils, scri-va il president da l'uniun, *Lucian Bigliel*. In pulit success è dentant er stà il champ da chant per uffants a Trun cun 28 participantas e participantas. Quia è stada ina da las activitads dal District da chant Surselva cun ses president *Ewald Vinzens*.